

重修兩淮鹽法志

兩淮鹽法志卷五十五

轉運門

淮南規復引地一

淮綱之興替一視楚岸之暢滯軍興後長江梗阻淮鹽不能運楚於是楚省督撫奏明借食川鹽溯自同治七年至光緒九年此十六年中兩江鹽政與川楚督撫爭禁川復淮之疏至再至三卒不果行故湖北之安陸襄陽鄖陽荊州宜昌五府荊門一州湖南之澧州一州至今未復說者謂轉圜之柄在楚楚爲川則川勝爲淮則淮勝信矣要之滇黔戡定川引本岸暢通則復

國家二百餘年之舊制固司淮鹺者之責也茲備錄章疏使知治體者論焉志淮南規復引地

同治七年十月兩江總督兼鹽政曾國藩奏竊照楚省本係淮南引地定額最多銷鹽最廣從前淮綱盛時歲徵各岸課銀甲於天下其徵諸蘇省者不及十之一徵諸江西安徽者不過十之三徵諸兩湖者則居十之六是淮綱之興替全視楚岸之暢滯爲轉移軍興以後長江梗塞淮鹽不能行楚經楚省督撫奏明借食川鹽原屬權宜之計臣於同治二三年間整頓鹺務維時淮商卽以收復楚岸爲請祇因引地被占十有餘年行之既習

爲常禁之未免太驟是以暫將鄰鹽釐稅酌量加重原
冀川私本重而日衰淮鹽漸進而日旺不謂川販巧於
趨避百計漏釐每運兩引之鹽僅完一引之稅臣訪知
其弊上年曾派委員至宜昌會同楚省委員公同掣驗
本年又減淮鹽之釐期收敵私之效非不多方補救乃
查鄂湘兩局積壓淮鹽不下十餘萬引存數極多銷數
極滯而川私紛至沓來較前尤盛推原其故總由鄂省
利食川鹽雖有掣驗之名而明讓斤兩近聞宜昌抽收
川稅仍不過六七折以致川販成本太輕來源愈旺是
前此繞越而偷行者今更肆行而無忌川鄂官商幾忘

引地之應屬何省請舉淮之受害於川者數端縷晰陳之淮鹽逆流上駛歷長江洞庭之險每船至少須裝千餘引船笨載重計自瓜洲開行非四五箇月不能達鄂非六七箇月不能達湘偶遇暴風立時淹消巨萬本銀悉歸烏有川鹽則自江順流而下勢等建瓴雜用小船靈便異常計程途則淮遠而川近論舟行則下易而上難此運道之捷於淮者其害一也淮南之鹽以餘東呂四兩場爲各場之冠所稱餘呂眞梁者也從前暢行楚岸其鹽色之潔白由於商力充足本年所產之鹽堆至次年始行開售堆愈久則滷愈淨近年垣商疲乏隨收

隨售鹽色不無稍減川鹽則自行楚以後廣開井竈其
色甚白其質甚乾川販因之而居奇淮岸因之而日廢
喧賓奪主莫斯爲甚此鹽色之勝於淮者其害二也淮
鹽定章以五百引起票係有鑒於道光末年改辦票運
不拘引數聽商稟認厥後承辦數千引之大販皆爲一
二十引之小販搶運所誤故新章定以限制一以杜無
本冒充之弊一以驗有力承運之資計請鄂湘五百引
非現銀七八千兩不辦川鹽則計斤不計引集資數百
千即可辦運鹽皆散裝旣官私之莫辨釐不預納亦來
去之自由此籌運之巧於淮者其害三也鄂湘兩局售

鹽皆以到岸之先後定出售之遲速鹽未到輪不准搶賣近數年來銷雖疲而商未跌價深得整輪之益但在船守風抵岸守輪計一檔之鹽非一年之久不得脫銷川鹽則到處可售得價卽賣銷路廣則窮鄉僻壤偏地皆私賣價輕則行家鋪戶非川不鬻此籌銷之便於淮者其害四也有此四害淮何能與川敵川鹽一日不停淮鹽一日無暢銷之望議者謂川鹽停止於川省業鹽之人有礙殊不知淮南通泰兩屬二十場垣商煎丁以及鈎摺捆忙人等不下數百萬戶兵荒年久困苦顛連爲從來所未有滿望江路通行規復引地徐圖轉機不

料鄂湘最暢之岸盡爲川私所佔西岸亦爲粵私閩私所佔場運各商倒歇之家固眾而煎捆各役失業之人尤多比之川省業鹽者何止數倍凡認淮引之商屢赴臣衙門呈遞稟詞請堵川私幾無虛日譬之家有田產任客民多年佔據爲尊長者忍視子弟之啼飢號寒而不爲之救有是情乎至湖北軍餉原以川釐爲大宗刻下髮捻俱滅軍事大定鄂省存營極少餉項足敷周轉況淮鹽內亦收鄂釐淮銷果暢鄂餉卽因之而增此時堵止川私核與前准部文俟淮鹽暢行應卽申明舊章嚴禁鄰私毋任侵佔等語實相脗合相應請

旨敕下四川湖廣各督撫停止川私行楚以復昔年之舊制而收經久之利權臣職司嵯權厯有歲年所徵課銀因軍餉要緊未能多籌解京私衷抱歉耿耿於心今雖交卸鹽篆猶思籌異日之有餘補近年之不足我

朝鹽法沿明舊制畫分引地係大經大法一成而不可易今南北軍務告竣而不力爭以圖規復則二百餘年之憲典自臣而隳其拂逆商情斂一時之怨厥咎尙輕敗壞成法貽後世之譏厥咎更重用是縷晰具陳如蒙

諭旨准禁川私應如何分立限期漸減漸停如何堵緝粵私潞私浙私閩私不復抽收鄰稅統由新任督臣馬新貽核

議章程奏明辦理十二月戶部議奏伏查淮南引地行
湖北省九府一直隸州行湖南省九府一廳二直隸州
共額銷官鹽七十餘萬引道光三十年改行票運額銷
引數雖難確計而票販銷售總以楚岸爲大宗誠如該
督所稱淮課甲於天下徵諸兩湖十居其六楚岸興廢
關繫淮南大局也自咸豐三年長江路梗前署湖廣總
督張亮基奏請借撥川鹽二千引運楚暫資接濟欽奉
諭旨允行並令一俟江路廓清淮鹽通暢仍照舊章辦理咸豐
五年楚省軍餉不繼復經前督臣官文奏收川潞票私
釐稅於宜昌府設局抽收川私襄鄖隨棗等處抽收潞

私安麻孝應等處抽收票私維時江路梗塞岸課兩懸
不得不暫予變通以濟民食而供軍用迨同治三年長
江路通卽據該督於籌辦淮鹽摺內奏陳疏銷輕本保
價杜私四條經臣部核議施行其疏銷輕本條內意在
重稅鄰私量減淮釐俾鄰本重而淮本輕淮鹽得逐漸
進步查同治四五兩年兩淮報收鹽釐數目每年約在
三百萬兩有奇同治六年收數少減經該督請減淮釐
以敵鄰私緩納場課以恤商販旋又經湖北省奏裁淮
鹽陸課以輕販本均經先後奉

旨允行在案無如楚岸地居四達私鹽處處可通川鹽隨流下

駛來源既旺收稅亦多楚餉賴以接濟是以本年秋閒署湖廣總督郭柏蔭先後奏停票潞鹽稅禁止入楚而於川鹽之病淮尙未敢議及今該督瀝陳淮南受病情形謂川私一日不停淮鹽一日無暢銷之望並稱鄂省見在存營極少餉項足敷周轉且淮鹽內亦收鄂釐淮銷果暢鄂餉即可加增因請

旨敕下四川湖廣督撫臣停止川私行楚以復舊制臣等查兩楚本淮南引地前以江路不通借撥川鹽復因軍餉不繼奏抽川稅今長江運道早通楚省軍事大定該督通籌淮南全局議請收回引地並籌及目前楚餉足敷周

轉兼欲以淮鹽內所收鄂釐抵川稅之不足自係體察情形確有把握所陳川私病淮四端透切詳明言皆有據况懇請規復舊制並非另議更張臣等公同商酌應准如該督所奏請

旨敕下四川湖廣各督撫臣將川鹽行楚章程妥籌停止其宜
昌沙市等處應如何撤局停稅並留卡巡查以杜偷越
應由湖廣督臣飭屬辦理並將裁停川稅日期截清報
部毋任局員私徵賣放致滋弊混至緝私之法務在清
其本源川鹽行楚已閱十有餘年近來廣開井竈添集
丁夫產鹽之所較之向年增多數倍其源一日不清其

疏一日不止應如何酌量封禁剴切勸諭之處應由四川督臣妥爲籌辦其原奏內稱如何分定期漸減漸停以及各路鄰私如何堵緝奏交新任督臣辦理之處應請

敕下新任兩江督臣馬新貽核議章程奏明辦理淮南楚岸既經奏禁鄰私務飭運司嚴禁商人不准稍有私鹽夾帶並飭垣商講求煎煉俾鹽色一律乾潔純白足以敵私其到岸候輪之鹽亦不准故擡鹽價致民間有食貴之虞否則鄰稅停收而鄰私不絕川鹽雖禁而淮私日增雖有規復楚岸之名並無裨益淮課之實較之見辦情

形轉屬無益有損該兩江湖廣四川各督撫務當不分
畛域實力妥籌總期弊盡利生以挽淮南大局是爲至
要再查粵私入湖南郴桂等處咸豐六年由臣部奏令
該撫設局抽稅見在票潞川私次第停止所有郴桂等
處抽收粵私應並令湖南巡撫查明奏請停止收稅嚴
行堵禁不准再行入楚以歸畫一其兩淮應用行鹽引
張並令兩江督臣查明委員赴部請領不得僅用鹽政
大票以符舊制奉

旨允行

恭載

上諭一道
制詔

同治十年二月鹽政曾國藩奏竊准部咨議復湖南巡撫

劉琨奏請於永寶二府試行官運粵鹽一摺衡州以下各屬能否不致侵灌近來淮南鹽釐收數逐形短少永寶二府係淮南口岸應由兩江督臣通盤籌畫有無窒礙淮綱之處妥議復奏等因同治九年九月初十日具奏奉

旨依議欽此欽遵轉咨前來先經前兼署督臣魁玉咨粵省會商妥辦茲准兩廣督臣瑞麟咨稱淮粵鹽務引地各有定界不能躡越行銷湖南永寶二府自粵東禁海遷竈以後向食淮鹽歷年引課奏報例由淮綱核辦今湘省議行官運粵鹽將鹽課撥歸淮綱不特款項輻輳考成

難於核計且由粵運鹽至湘節節均係粵省引地其中不肖船戶影射夾帶沿途灑賣情弊勢所難免實於粵省引課大有關礙況粵東遞年場產鹽斤亦僅敷粵引配運並無溢額若加增永寶二府食鹽場產不足又復從何購買湘省此議雖爲籌裕餉源起見而更易口岸委屬窒礙難行咨復核辦等因臣查湖南永州府一州七縣寶慶府一州四縣自康熙六年題准銷淮鹽雍正乾隆時亦屢有改食粵鹽之議均經內外臣工奏駁有案前人立法具有深意行鹽必分界限係我

朝大經大法凡兩省接壤之區不許鄰私稍逾尺寸引界

一定縱有奸商偷漏影射入境卽以私論民尙知所畏懼官亦便於稽查卽如蘇松常鎮皆係浙鹽引地與淮南場竈僅隔一江鎮江與瓜州淮棧僅隔咫尺路旣便捷價亦減輕然必須行銷浙鹽而不能改食淮鹽者正以界限分明則紀綱永守也湖南之永寶二府地居湘岸極邊又被粵私徧地侵灌淮引久已不至該處然不敢以二府改隸粵引者誠以永寶一經改隸則衡州亦將占奪長沙亦將侵銷紀綱一紊萬事紛亂且留此二郡藉以保長衡之藩籬尙可冀將來之暢旺且鹽政不敢棄引地而不顧猶之疆臣不敢棄邊邑而不守今兩

廣督臣既咨稱窒礙難行而兩淮運司方濬頤亦詳稱
湘省各商均不願以永寶引地改屬粵中所有湘省官
運粵鹽行於永寶之處臣未敢輕於議准仰臣更有請
者部庫餉源以鹽課爲大宗鹽課又以兩淮爲大宗而
兩淮引地之被侵奪者湖北全侵於川鹽湖南則既見
侵於粵鹽又大侵於川鹽臣初次奏定淮南新章但重
加抽鄰稅不遽拒絕鄰鹽旋因軍務大定又於七年奏
請禁止川私入楚無非欲收回引地冀復昔時之盛見
查川私侵楚以鄰稅收數計之同治四五年間其勢稍
衰自七年分逐漸加增八九兩年川鹽愈來愈旺照淮

南之六百斤成引者計之每年占銷不下二十萬引蓋一萬二千萬斤之多而繞越夾帶透稅之私尙不在此數湖北九年分所銷淮鹽僅七萬餘引比川鹽銷數不過三分之一喧賓奪主莫此爲甚運庫課釐日減上年秋冬所收短絀尤甚以致部撥

大婚彩綢之款不能應解鹽積如山庫空如洗場商數百家艱窘尤甚見在存堆在途到泰到瓜之鹽共有五十餘萬引無處銷售存堆者苦成本之占擱到瓜棧者有上倉住船之費有換包折斤之耗公私之虧累尤鉅日內紛紛至臣處呈稟請令運商先買繳價運商亦因楚岸不

銷觀望不前今年垣產甚旺臣勉強借給銀十五萬兩令場商收買春產場商猶以款少鹽多不能徧收深恐竈丁賣私通梟尤慮其貧極生變而船戶數千亦因無鹽可運窮迫無聊蓋淮南自官商以至船竈夫役數十萬人此兩月閒皆皇皇焉若生計之將盡者不料鹽務竭蹶一至於此臣辦理不善咎固難辭亦實由楚岸引地盡被川鹽侵占譬之農家被人奪去田產舉室無措也部文有云通泰各分司場竈所產鹽斤無從銷售必致私梟競起關係全局所以百數十年無有改易淮南口岸之議殆不啻目擊淮南近日苦況矣臣於七年九

月奏禁川私入楚一疏經戶部議准欽奉

諭旨飭李鴻章等檄局停稅飭吳棠封禁井竈並令覈議復奏旋以八年秋李鴻章復奏川鹽未可遽禁者六端而議於沙市設局以川鹽八成淮鹽二成配銷吳棠復奏川鹽濟楚難以遽停者四端而力言井之不宜封禁經戶部先後議復均令前兩江督臣馬新貽力圖補救妥商復奏厥後沙市二八配銷之局初議以斤計繼議以包計川鹽每包三百五十斤至八十斤不等八成則近三千斤淮鹽每包連包索八十六斤二成則僅一百七十二斤名爲淮占二成實則不及一成由此川勢日旺淮

內務府志 卷五十一
銷日微淮商吞聲飲恨而無如之何今欲挽回一二惟
求

皇上敕下戶部主持全綱剖斷是非縱不能全禁川私入楚亦
當使淮多於川保守

國家之大經大法或淮八成而川二成或淮七而川三成
雖極多亦不得滿四成庶幾官私判別成憲常昭其分
成之法或指明某府某縣暫准借食川鹽或鄂境每城
准行川鹽若干萬斤不許溢額但求部臣將大概規模
斷定其餘細微條目臣當與川楚諸臣妥商章程具奏
凡疆吏辦事全賴各省和衷乃克有濟向來江督鹽務

本仗楚督緝私催銷始有起色道光年間林則徐周天爵爲楚督時則淮鹽大暢他人爲督其時並無袒護川鹽之事而苟非一心維持淮鹽則淮銷常滯蓋責弁役以緝私課州縣以銷數非本省大吏不足鞭策之也目今湖廣督臣李瀚章曾在臣軍久管糧臺相得益彰深知其顧全大局毫無私見於臣處事件無不竭力相助然外閒頗議其袒護川鹽膜視淮鹺非與淮爲難也該督見鄂中水陸各營京協各餉需款甚鉅恐一旦川鹽不暢餉項驟減前數任已成之規不欲自己而廢且見貧民散勇謀食於川鹽者多恐其失業滋事此二者籌

之愈熟故於川鹽護之愈堅今欲楚岸離綱之平允但在楚督一心之轉移一心向川則川銷旺而眾商有恃矣分心向淮則淮銷旺而眾商亦有恃矣臣所求者淮鹽堆積場棧者五十餘萬引堆積鄂湘者十餘萬引於此七十萬引中稍稍行銷楚岸則運商場商之氣爲之一蘇煎丁捆役及謀食於淮之眾不致失業滋事卽爲大幸而淮南本分之引地不至棄而他屬亦臣盡職之一端至於餉項之盈絀則臣絕不敢爭昔年初定章程淮鹽行楚每引撥釐銀四兩二錢解交湖北糧臺後遞減爲二兩四錢初章撥釐銀六兩一錢二分解臣安慶

糧臺後遞減爲三兩九錢二分七釐今欲鄂省減去川鹽入款願將臣處應得釐銀多撥數成歸鄂抑或全數歸鄂如其全數歸鄂則每銷淮鹽一引鄂省可得銀六兩三錢有奇以近日銀價計之合錢十一千有奇較之鄂省銷川鹽六百斤僅收川釐十千有奇尙屬淮勝於川於鄂餉有盈無絀果能勤緝川私鄂中應無難辦之處儻蒙

皇上乾斷楚省引地必歸淮南作主其餘各節臣當與李瀚章吳棠妥商無不通融辦理俟湖北酌堵川鹽稍有起色再商湖南堵川之法續行奏辦戶部議奏臣等伏查川

鹽行楚試行之始因江路不通淮鹽未能到岸爲此權宜之計繼以鄂省餉需半出鹽釐一旦驟禁川私恐於京餉各項均有妨礙是以同治七年十二月閒臣部議覆曾國藩請禁川私收復淮南引地摺內卽欽奉

上諭曾國藩所稱淮鹽並收鄂釐淮銷果暢鄂餉卽可以加增將來所收鄂釐較之川稅數目能否不致大相懸殊卽著李鴻章等體察情形具奏等因欽此旋據李鴻章在湖廣總督任內覆奏川鹽難禁六端因請川淮分成配銷又據四川總督吳棠覆奏井竈難遽封禁四端均經臣部核覆令各督臣將淮鹽川鹽如何分成配銷仍將新開私井

逐漸封禁妥籌覆奏並節次咨催在案茲據曾國藩摺
內聲稱鄂省所定川入淮二分成配銷章程按包核算
名爲搭銷淮鹽二成實不及一成之數見在淮南場鹽
存堆及存泰州瓜棧者共五十餘萬引其運赴鄂湘兩
岸滯銷未售者又十餘萬引通計七十餘萬引場運各
商成本占擱以至船戶捆役待食不下數十萬人生計
將盡鹽積如山庫空如洗致部撥京餉各要需未能及
時籌解所奏自係實情查川鹽入楚所以濟淮運之窮
見因川盛於淮轉致淮鹽無地運銷所議課釐視同治
四五年閒大形減絀且查近年鄂省報收川釐未能視

前倍增是淮引之絀銷已見而川稅之挹注難期臣部綜核度支總以課餉贏縮爲考成之實效鄂省不欲停減川釐所收釐數未足撥抵淮課而淮南大局已因此隳壞利害相權情固立見該督所奏將楚省向食淮鹽口岸按照淮鹽八成川鹽二成行銷或淮鹽七成川鹽三成行銷川鹽至多不得滿四成並指明府縣暫准借食川鹽若干不准溢額各事宜究竟能否實力奉行不致別生弊端之處臣部未能懸擬相應請

旨敕下兩江督臣會同湖廣督臣四川督臣妥議章程奏明辦理至該督所稱鄂省減去川釐入款願將淮釐多撥數

成歸鄂或全數歸鄂一節查鹽務爲帑頂大宗無論淮
川湘鄂所徵均屬

國課總期於商民兩便而京協各餉仍賴以接濟無虧辦
理方爲妥善各該督務當不分畛域協力籌商以整釐
綱而維全局至該督既稱扶淮抑川在川私之侵灌固
宜嚴緝而淮私之夾帶尤當預防應令認真掣驗不許
重斤影射隱虧課額並嚴飭垣商講求煎煉一律乾潔
足以敵川是爲至要

互見湖南鄰稅

謹案以上議淮鹽引地不可輕棄

同治十年十二月兩江總督曾國藩奏竊淮南鹽務經臣

於同治三年奏定新章請將所徵課銀按半年奏報
次鹽釐隨課並報欽奉

諭旨敕部議准前已報至同治九年六月底在案茲查九年七
月初一日起至十二月底止共收課釐銀一百三十四
萬八千六百三十四兩有奇又收鹽釐錢九萬串有奇
伏查淮南上年八月以後考私充斥官引滯銷皖省以
及江甯食岸停稱多日幾有不可支持之勢幸各局堅
守輪章藩籬不致盡撤西岸鄰私尙形斂迹銷數勝於
他岸統計九年下半所收課釐比較八年下半僅短收
銀四萬餘兩各路軍餉勉爲敷衍而楚岸引地臣與湖

廣督臣李瀚章函牘往來籌商已久未獲尺寸之益銷
路不能開拓場鹽無可疏通煎丁人等時虞滋事本年
春秋兩產均經臣借撥官項發場濟收藉救竈困於垂
危聊補商力所不逮但庫款有限不能持久欲求鹽銷
之旺非籌堵川私不爲功然川鹽行楚在鄂餉旣所關
甚鉅在川商亦習慣成常積重難返勢不能遽行全堵
擬先規復武昌漢陽黃州德安四府引地以期由近及
遠漸推漸廣一俟楚省會議定章卽當另行奏辦

互見淮南

奏銷

同治十一年正月兩江總督曾國藩會同湖廣總督李瀚

章四川總督吳棠湖南巡撫王文韶奏伏查行鹽各有引界今以川淮兩省之鹽同行湖北一界之內此暢則彼滯勢有必然近來淮南銷數日疲存鹽壅積無術疏通皆由川鹽到處灑賣遂使淮引之界幾被川鹽占盡論鹽斤則色白味鹹川貨本勝於淮論搬運則下水順流川路較近於淮論民情則楚人食川習慣而已成自然論官事則川販聚楚驟禁而恐生事變故川私侵占淮南引地雖屬大紊紀綱之事而有萬難遽變之勢今欲於積重難返之後挽回一二仍當暫分疆界爲後圖規復之計湖北淮引之地九府一州此

國家之大法終古不變者也。就川私侵淮之地而於其中收復數府，專行淮綱酌分數府准銷川鹽者，此目下之權宜四面兼顧者也。臣等函牘往來籌商再四，就湖北九府一州計之，見定將武昌、漢陽、黃州、德安四府先行歸還淮南，專銷淮鹽。其安陸、襄陽、鄖陽、荊州、宜昌、荊門五府一州仍准川鹽借銷。議定淮分之界不准川鹽侵入分寸，而川分之界仍可由淮商就中酌設子店撥售零引，以明本係淮引地方，不可喧賓而奪主。一割而永棄前於沙市所設配銷局，既於川販多所未便，而淮銷亦並無成效。應將此局裁撤，移設新隄，改爲分銷淮鹽。

局至武漢黃德四府內湖北所設抽收川稅水陸局卡亦一律裁撤禁止川鹽不得顆粒侵銷四府地界此會議分界之大略也淮鹽滯銷之由固由川私充斥而銀價日昂鹽價日貴亦屬有礙銷路初定章時湖北每銀一兩約易錢一千五百餘文今則增至一千八百餘文居民買鹽則用錢而局中售鹽則收銀水販成本因之暗增不能不量予酌減查楚岸定章本定每引售銀二十四兩厥後遞減至十九兩二錢見擬每引再減售價一兩二錢每正引六百斤定售銀十八兩所減之價在於應解鄂淮鹽釐內各半分扣將來銀價加跌再將鹽

價隨時酌提以昭平允此減價之大略也地方州縣本有緝私疏銷之責若不加意整頓深恐完稅之川鹽雖申禁令而無稅之川私勢更蔓延加以潞私北私交相侵灌名雖定價仍無補於淮銷除湖北飭派緝私各兵勇照常布置外所有武漢黃德四府擬擇扼要之地設卡分堵凡潞私北私及川鹽越界之私仍由臣瀚章通飭各州縣不分畛域幫同局卡實力緝拏每年年終由督銷局會同湖北鹽道視銷數之暢滯定州縣之勤惰開具清摺送由臣等會同考核酌量勸懲以收實效一面由臣國藩責成運司督飭各場講求煎煉之法務使

淮南鹽色潔白期與川鹽相敵儻有以醜劣低鹽運棧立將場員記過撤委此又講求緝務整頓鹽色之大略也兵燹以後戶口大減各岸應銷之鹽較昔年額數已屬極少而業鹽以謀食者人數日眾場井之產亦日多臣等不敢期銷數之極旺但求業淮鹺者不至因銷路被奪而遂絕生計業川鹺者不至因銷路被堵而別出事端是卽兩全之道此次分界之後如果淮釐日贏鄂釐日絀卽當貼補鄂餉期於均分餘利而止如果淮銷仍滯川銷大暢卽當嚴堵川私期於不侵新界而止若其軍事大順滇黔肅清川鹽自有本管之引地而今日

分割之五府一州仍當歸還淮綱淮南引地行之數百年不刊之典臣未敢輕於議割也總之隨時體察川淮情形補偏救弊務在不戾時宜不墜憲章至湖南堵川之法前經臣國藩奏明俟湖北酌堵川鹽稍有起色續行奏辦見查湘省祇有岳州常德澧州三屬行銷川鹽岳州係達省會之門戶常德係入辰沅之要津均爲淮鹽緊要口岸亦經議定專歸淮銷惟澧州與荊州相近川鹽運往路近價輕應暫分與川銷其餘未盡事宜俟開辦數月再行酌核續陳四月戶部議覆伏查行鹽各有引界今淮鹽川鹽同銷楚岸必致此暢彼滯况運道

則川便於淮鹽色則淮劣於川淮銷日絀川販日多勢
且積重難返是以川淮分成配銷之議臣部恐其虛擬
成數不足以收實效今據曾國藩等覆奏議定分界行
銷以武漢黃德四府專銷淮鹽安襄鄖荆五府一州暫
銷川鹽淮分之界不准川鹽侵入分寸川分之界仍由
淮商設店零售查川鹽行楚日久一時必欲概行禁絕
實於餉項民情兩有窒礙不能不爲權宜之計似此畫
分疆界徐圖規復較之分成搭銷辦法稍有把握應請
准如該督等所奏暫行分府各銷各界惟於川鹽界內
分設淮店一節旣難限以配銷成數且同一官鹽地方

官吏又未便顯分軒輊能否彼此相安不致別啟爭端之處應由江楚各督臣悉心體察斟酌盡善再行奏明辦理其武漢黃德四府向設抽收川稅各局卡卽令統行裁撤並將撤局日期截清報部毋任局員私征賣放致滋弊混至裁撤沙市配銷局改設新隄自係酌中扼要擇地量移應令改爲分銷淮鹽局卽由湖廣總督遴選賢員常川駐局辦理一切事宜以期稽查巡緝毋稍遺漏又所奏酌減鹽價查近來銀價日昂各商賣鹽以錢交課以銀未免暗虧成本應卽准照從前減定鹽價每引十九兩二錢之數再減一兩二錢每正引六百斤

定價十八兩以示體恤仍令實力疏銷增額認運以裕課款至川鹽行楚業已駕輕就熟今欲畫定界限全在各該地方官堵私得力民間不能淡食私淨則官鹽自暢應令湖廣督臣擇要置卡嚴密分堵並令轉飭武漢黃德四府界內各州縣官實力梭巡毋許鄰私絲毫偷越每屆年終卽以銷鹽之暢滯考定州縣之勤惰分別懲勸俾各官知有考成庶不致私充官絀至淮鹽質色本不如川儻再加以泥沙麝雜民食何堪應令江督轉飭運司嚴督各場員先於煎煉時務求精潔再於起運時嚴查麝和如有低鹽到棧一經察出立將場員參撤

並將該場商加等責罰如此立法將來淮鹽自可敵川
楚民亦不致貴川而賤淮矣又查川鹽之借運兩處初
因江岸不通淮鹽無片引到岸繼由黔邊不靖川鹽無
本岸可銷始則遷就變通後乃喧賓奪主今既圖復舊
制則淮有淮岸川有川岸見在楚省雖未能淨禁川鹽
而黔中軍務日有起色一俟邊圉肅清卽將今日川鹽
借銷鄂省之五府一州全行退出歸還淮地無許再有
侵占以肅鹺綱又節流必先清源川鹽行楚後該省廣
開井竈前經臣部奏令封禁嗣於八年十一月據川督
吳棠以未便遽封等情奏覆臣部議令查明新開私井

仍行逐次封禁如實有礙難封禁之所卽飭專案報部
俟核准後照留一二照例分別等則按井收課迄今事
逾三年川省新開各鹽井是否逐漸封禁酌留若干處
加收新課若干兩該督臣並未聲覆應請

旨飭下吳棠迅飭四川鹽道查照臣部奏案詳晰清查新開鹽
井若干處封禁之外酌留若干照何等則徵收課銀逐
細開單奏報以杜私商而重課款其湖南一省據該督
等奏稱祇有岳州常德澧州三屬行銷川鹽岳州係通
省會門戶常德入辰沅要津均爲淮南緊要口岸亦應
專歸淮銷澧州暫時仍銷川鹽等語查鄂省旣經議准

川淮分府行銷湘省自應照辦以歸一律所有岳常二府既議專銷淮鹽應令湖南撫臣督飭鹽道委派委員認真經理毋令川私稍侵淮界至澧州一屬應否分銷淮鹽並令俟湖北安襄等五府一州將分設淮店一節辦有端倪後再爲查照舉行奉

旨依議欽此

謹按以上議將武昌漢陽黃州德安岳州常德六府先歸還淮南專銷淮鹽

光緒二年五月鹽政沈葆楨咨商兼署湖廣總督翁同龢照得淮南楚岸引地於同治十年會奏分界行銷湖北

以武漢黃德四府先行歸淮湖南以澧州一州暫行歸川摺內聲明俟滇黔肅清川鹽自有本管之引地則分割之地仍當歸還淮綱在案分界以後原冀淮引逐漸暢行便可日久相安無如鄂湘兩局近年銷數較未分界以前每年所增不過一二萬引而通泰場鹽產浮於銷遞年積壓愈積愈多同治十年已經奏明積有五十餘萬引至今又閱五年之久不下三四綱之多堆積如山幾無地以容之其存棧存岸之鹽尙不在此數之內各場商始則占攔已資繼則籌借客本其利耗於滷耗缺斤再耗於往日水腳三耗於借貸月息目前卽出重

息并有貸無可貸之苦一經停收海濱億萬竈戶生計頓絕鋌而走險事在意中危迫情形實有岌岌不可終日之勢迭據通泰場商聯名公稟懇請酌復楚岸引地實有萬不能已之苦衷就川省而論滇黔兩省固有引地已報肅清自應將借銷淮地全數歸還方爲正辦惟本部堂深知鄂省餉源出於川釐淮南鹽色未臻上乘自宜淮鄂兼籌不便操之過急斟酌再四擬將湖南之澧州湖北之安陸襄陽兩府先行收回在川省退此二府一州所短無幾而淮南各場每年得增數萬引鹽已不啻枯木之逢陽春久旱之遇甘雨

光緒二年六月署湖廣總督翁同爵咨據湖北藩司鹽道
宜昌川鹽總局會詳稱查楚岸本係淮南引地前因江
路不通淮鹽梗絕借銷川引以濟民食兼爲籌餉之計
迨後軍事大定川鹽行楚已久民情習慣相安不能遽
禁且爲鄂餉所關未敢輕議停止同治十一年江楚會
奏畫界分銷將湖北之武漢黃德湖南之常岳等府歸
淮皆係向來銷鹽最旺之地其他荆宜襄安鄖荆澧五
府二州歸川仍准淮引兼售今兩江督憲商還安襄二
府及湖南之澧州原爲整頓淮綱起見但揆時度勢淮
鄂兼籌諸多窒礙蓋鄂省餉源以川鹽課費爲大宗其

指款坐撥者每年滿營兵餉二十六萬有奇戶部十萬
固本六萬荆宜留防水師二萬數千皆係絲毫不能短
缺其他各省協餉及本省軍餉大半取給於鹽課自川
淮分界以後川鹽課稅日少指撥各餉已形支絀正在
竭力籌畫於襄樊試行官運以冀稍有裨益若將二府
一州改歸淮銷川鹽銷路愈蹙收數勢必大減則京協
各餉恐益無從措手伏思鄂餉淮綱均關

國課當此淮鹽壓積淮商疲困之際若能有益於淮而於
鄂餉尙無大礙自當遵照兩江督憲來文辦理惟安襄
四達之地北路各私侵灌殆遍地痞梟販恃爲營生川

鹽色味俱優尙可與私相敵淮鹽旣不如川且須固全
商本額價旣昂再加汭流而上之費成本愈重售價愈
增小民貪賤食私堵緝殊不易易况卽陽居安襄上流
運銷川鹽勢難飛越若由襄河上駛川淮牽混莫能究
詰刁販奸商沿途灑賣勢必別生轆轤至澧州一屬尤
難驟停川鹽緣軍務凱撤以來湘營各勇實有難於安
插之勢幸澧屬准銷川鹽肩挑步擔藉可糊口若盡缺
其謀生之路恐鋌而走險患更急切於淮甯統籌熟計
二府一州雖舊係淮鹽引地而時易勢殊恐未可遽議
規復且恐徒損鄂課而又無益淮綱從前淮北潞安之

鹽銷入鄂境鄂省歲收課約二十萬千文嗣因北潞侵
占淮銷奉文禁止湖北遂失此鉅款而北潞兩私照舊
來鄂雖堵緝不遺餘力終難禁其侵灌於淮銷絲毫無
益其前鑒也總之鹽務爲帑項大宗無論川淮湘鄂所
徵收均爲

國課祇期於商民兩便安輯地方而於餉項無虧若徒爭
引地之虛名有礙餉需之大局更啟小民蹈罪干禁之
釁不若仍守從前奏定畫界分銷章程再行數年俟滇
黔之舊引暢行川中之續開井竈禁閉各省之協餉停
撥然後再圖規復淮綱則軍餉無虧紕之虞商民免更

張之慮似爲安便

謹按以上議安襄二府澧州一州礙難規復淮綱

光緒二年六月戶部咨議覆御史周聲澍奏請收回淮鹽引地禁止川私並酌議章程五條一摺查原奏內稱鹽課以兩淮爲大宗淮南課額楚岸最多軍興以來江淮道梗湖北湖南借運川鹽金陵克復前兩江督臣曾國藩重整淮綱議請重抽川稅以暢淮銷同治七年九月曾國藩奏禁川私入楚經部議准乃鄂省官吏利銷川鹽遂致川私充斥九年三月曾國藩奏楚省引地被川鹽侵占太甚一摺內稱川私侵楚以鄰稅收數計之自

七年分逐漸加增照淮南六百斤一引計算每年占銷不下二十萬引繞越夾帶偷稅之私不在此數湖北九年分僅銷淮鹽七萬餘引比川銷不過三分之一今欲鄂省減去川釐入款願將兩江應得釐金全數歸鄂每銷淮鹽一引鄂省可入銀六兩三錢有奇較之鄂章銷川鹽六百斤僅收川釐十千尙屬有盈無絀應無難辦之處其言可謂痛切矣乃既不見從反札湖南督銷局將衡州府等處緝私巡船概令裁撤自有此舉委員不敢緝私巡船竟同虛設不得已於是年八月奏請暫行分界銷售以湖北之安陸荊州襄陽鄖陽宜昌荆門五

府一州湖南之澧州一屬借銷川鹽部雖議准仍聲明川鹽因黔邊不靖無本岸可銷暫照所議一俟黔邊肅清將川鹽借銷各屬全行退出歸還淮地並稱行鹽地界乃我

朝二百餘年大經大法卽時勢所迫暫予變通久必復歸舊制此正論也先是川鹽鄰稅每斤抽錢八文以五文歸淮三文歸湘李瀚章忽減作五文以三文歸淮二文歸湘湘省以爲數太微咨覆全減每斤只抽三文矣又稱川鹽成本較重將湖北所收陸課奏請停收又請將湖南澧州花畹岡稅局裁免經部議駁旋又頂奏部仍

議駁且謂其徒示體恤於川販未權利害於淮綱顧川而不顧淮未免太偏並聲明川淮分銷楚界本屬暫時之計未便喧賓奪主是引地之不容久假部議已再四申明矣無如意見所持屬吏望風疑畏川梟日益橫行同治十三年二月初五日竟敢聚眾持械將岳州府境之鴨欄磯緝私卡局焚搶一空殺傷巡船水勇督臣獨將文武卡員奏參而滋事首要各犯則未拏辦一人旋經刑部咨查亦竟置之不復自後由湖南撥勇戍守而委員不特不緝川私反力爲護送致湖北沔陽州之潘家壩等處又有毆勇毀卡之事督臣又札行湖南督銷

局許川私假道常德辰沅以達貴州沿途灑賣聽其所爲湖南借銷名雖澧州一屬而南連常德東接岳州旁及鄂省州縣川私路路可通湖北名雖荆襄安鄖五府一州而樊岸分銷局旣被擠撤川私直達沔陽州境及嘉蒲崇通通山各屬此近來川強淮弱之實在情形也鄂省袒川之意大約因川販太多禁之恐失業之民滋事不知川鹽自有引地前因黔邊未靖無本岸可銷今全黔肅清川鹽引地旣復販徒亦有所歸豈容復占淮地且自軍興後淮引久懸場鹽積滯百餘萬引各岸積至數十萬引場竈之困由於滯銷滯銷之源由於私占

儻海濱七八百里竈丁夫役船戶數十萬人無可謀生
獨不慮其滋事乎或又以鄂餉爲詞查同治十年戶部
奏稱鄂省必欲行銷川鹽原爲抽餉起見乃近年鄂省
所報川釐數目遠不及淮課之多是淮銷之短絀旣見
川釐之挹注無期應飭江鄂疆臣力圖規復等語是川
鹽並無益於鄂餉也川鹽取巧舞弊每包四百斤或數
十斤不定散裝船底無數可稽視淮鹽之出進悉憑官
局按引扣稅不爽分毫者孰多孰少乃必取少棄多故
違定制耶從前鹽務積弊其利上不歸官下不歸民而
盡歸中飽自前兩江督臣陶澍改用票法稅課倍增曾

國藩推行於淮南自改章至出缺之日止兩淮已收過課釐一千七百萬兩今則益多以五百引一票計之多銷一票釐課可得三千兩場地錢糧三百餘兩儻能盡杜鄰私則兩湖七十七萬之引額不難復舊卽如湖南之平江向食碱鹽自一岸川私不能行每年銷至萬引在湘岸內獨早運三綱此私淨官暢之明驗使楚省全岸能早銷一綱卽可入銀一百六十七萬此引地必應急復之實在情形也應請

旨敕部妥議並飭下兩江督臣沈葆楨署湖廣督臣翁同爵照部議原案收回湖北荆襄等府州及湖南澧州一屬

歸還淮地於湖北平善壩地方遴員設卡認真巡緝則川私斷難偷越釐課可以立增等語臣等伏查淮南引鹽行湖北省九府一直隸州湖南省九府一廳二直隸州年額銷引七十餘萬道光三十年改行票運歲銷引數雖難確計而票販運鹽總以楚岸爲大宗楚岸興廢關係淮南大局自咸豐三年長江路梗經前署湖廣總督張亮基奏請借撥川鹽迨六年復因軍餉不繼又經前督臣官文奏請抽收川稅川鹽自此公占楚岸日銷日旺楚蜀官商民等倚爲利便勢遂不可收拾同治二年原任兩江總督曾國藩奏准鹽路通請飭整理七年

曾國藩又請禁川私入楚收復淮南引地均經臣部議
准並奏令四川督臣查禁川井兩湖督臣嚴設巡卡旋
據前任兩湖督臣李鴻章奏川鹽行楚未可遽禁請設
局以川八淮二分成搭銷並據前任川督吳棠奏稱井
竈礙難封禁復經臣部議以淮鹽銷數太絀奏飭江督
將應如何分成配銷暨如何逐漸減川增淮擬定章程
奏復又駁令吳棠仍將該省私開新井逐次封禁迨至
同治十一年曾國藩等奏楚岸淮南引地暫留川鹽分
界行銷以湖北之武漢黃德四府湖南岳常二府專銷
淮鹽湖北安襄鄖荆宜五府一州湖南澧州一屬暫銷

川鹽淮分之界不准川鹽侵入尺寸川分之界仍准淮商設店零售亦經臣部議准並聲明川鹽因滇黔未靖無本岸可銷暫照所議一俟兩省肅清將借銷楚岸全行退還淮商以歸舊制十二年三月六月前任湖廣督臣李瀚章兩次奏請停收湖南澧州川稅經臣部議以澧州毘連岳常二府本屬淮南引岸若川稅減輕淮銷必滯先後駁令照舊抽收等因各在案是楚岸之應行禁絕川鹽歸還淮引曾國藩屢爭於前臣部力持於後所以亟籌規復者不啻至再至三誠以法莫善於守成而利必期於經久也夫淮課川釐均爲餉需所繫使相

較兩無贏縮亦何煩固爲爭執必拘拘焉議復向章所以然者淮鹽配銷楚岸票有的名課有定額分毫不能虧短不難查出立追川販則隨人隨地任令沿途灑賣其中官放私漏漫無稽考一也淮鹽每引六百斤著爲定數官局按引抽稅雖欲取巧無從川鹽則任意軒輊每包重或三四百斤輕至數十斤不等誠如該御史所奏多寡無數可考又安能保無偷漏二也同治九年曾國藩議欲鄂省罷收川釐將淮釐全數歸鄂每銷淮鹽一引鄂省可入銀六兩三錢有奇若能盡復兩湖七十七萬引額綜計淮釐所入之數較之近年湖北每年報

收川釐不過錢一百五十餘萬串湖南每年報收川釐
不過錢三四萬餘串者孰多孰少三也楚省不欲停減
川釐而所收釐數實未足以抵撥淮課然淮南全局已
由此敗壞決裂利害相權孰得孰失四也川楚兩省不
此之圖徒狃目前近利深憚規復舊章坐視川銷日橫
而淮南之票販場竈下逮船腳損夫等數十萬戶坐守
積鹽數百萬引無可運售萬一變生不測厥咎安歸且
見時防海西征籌餉尤第一急務鹽課爲餉項鉅款而
淮課又甲於天下淮課之出於楚岸者十居其六欲整
淮課必須先復楚岸楚岸盡復則淮課裕而餉源自裕

該御史周聲澍條陳淮南鹽務歷引臣部奏案請禁川鹽入楚以復淮南引地並引曾國藩原奏及淮南舊案力陳湖督偏袒川鹽之失且稱淮課倍於川釐引地必應急復等語自爲上禪

國課下順商情起見第恐空言復淮不能實力禁川仍難挽回積弊夫禁川必先籌安置川商之法復淮亦必先籌整頓淮鹽之法均未便以操切從事臣等公同商酌謹擬禁川復淮循漸布置章程五條請爲

皇太后

皇上縷晰陳之一請查封私井以塞川鹽之來源也查同治

七年臣部議復曾國藩奏禁川鹽入楚摺內卽請飭川督將近年私開井竈封禁旋據吳棠復奏有未禁之先不能區別應封應留旣禁之後不能察其或封或不封等語經臣部駁以部中見存四川奏銷款冊內開通省鹽井八千八百三十二眼按上中下等則納課是該省舊開各井不難按籍而稽如某處某井查係冊內所有曾經按則納課者自在應留之例若冊中所無卽屬新開私井亟應官爲封禁縱或變通成例准其暫留亦應責令分等納課何致漫無區別任聽奸商隨意私開於川課絲毫無加而於淮綱大有所損行令查照前奏一

律封禁乃迄今將及十年未聞該省認真查辦竊恐先開之私井未能禁絕而續開之私井日有加增川中無課之鹽愈多淮南銷鹽之路愈滯撓壞鹺綱莫此爲甚應卽請

旨敕下四川督臣李瀚章嚴飭鹽道遴委妥員分界巡查迅將未經入冊之新開私井全行封禁毋稍姑容亦毋許假手吏胥藉端滋擾旣禁以後由官隨時密訪不得任令再開儻有實係礙難禁封之處並令先行專案報部俟核准後方准酌留一二仍分等則按井徵課勿任朦混偷漏該督等果能實心經理庶私商之源不禁而自

塞矣一請疏通邊引以分川鹽之銷路也查四川引鹽除行銷本省外如雲南省之昭通貴州省之貴陽等府州縣均係例食川鹽口岸臣部於同治十一年議還曾國藩等奏楚岸暫留川鹽分界行銷摺內卽聲明川鹽因滇黔未靖無本岸可銷暫准借銷楚地一俟邊圉道通卽應將鄂省之五府一州湘省之澧州一屬全行退出歸還淮地毋許再有侵占等因在案今雲南久報肅清人戶漸皆復業應請

敕下四川總督李瀚章督率鹽道迅卽查明滇黔二省向銷川鹽口岸如舊商尙在者責令舊商趕緊運鹽往售若

無舊商之處勒限招商查照舊額一律配鹽運銷毋許
遲延觀望並令將舊商人各姓名行鹽處所配運日期
先行造具清冊專案報部備核一面查照臣部奏案卽
將湖南湖北借銷川鹽各府州退還淮商以清行鹽疆
界似此辦理庶邊民無虞淡食川引亦得暢行兼之私
井旣封產鹽有數自不能再占淮岸矣一請復設巡卡
以遏川鹽之來路也查鹽法志開乾隆三十五年臣部
議覆兩淮鹽政李質穎請移巡役堵截川私摺內聲稱
宜昌爲川私入楚門戶實淮南綱地之藩籬見在設卡
自東湖縣所屬平善壩起距巴東三百餘里蓋川江白

巫峽而來奔騰至此稍平故名平善客船始能停權巡役方可盤驗因於此閒設卡自平善壩至南津關十五里兩山壁立一水中流實爲天生要隘復設巡役巡船專司堵禦自南津關五里爲西壩原名府河卽宜昌通判駐劄之所均係上游扼要入楚必由之路該通判督役稽查如遇川私偷越上則鳴鑼操舟追趕下則接應堵截並無別徑可逃自西壩以下一百五十里爲宜都縣之白洋河江流始緩水陸交通商船必於此停泊恐有私鹽船隻由卡逸出於此處又設巡船四隻巡役三十名節節盤查立法極爲周妥等語今該御史請於湖

北平善壩地方設卡巡緝實與舊制相符見既疏通邊引川鹽自有本岸可銷若再浸灌楚地卽以私論務當嚴密查拏惟自乾隆年間迄今已逾百歲所有設卡巡私各地界或應仍照舊章或宜隨時變通應請

旨敕下兩江湖廣各總督會同遴委熟悉地勢之員於舊設巡卡各處所及川楚毘連界上周行相度酌量設防層層攔截毋任川販片帆隻艦再得越入楚境民間不能淡食私淨則官自暢行其宜昌府通判應否仍令移駐西壩兼轄鹽巡並令各該督會商具奏再湖北宜昌府之鶴峯長樂兩州縣施南府之恩施宣恩利川建始咸

豐來鳳六縣均係川鹽引岸其間應如何巡察毋使隨地侵灌之處亦令湖廣督臣核定章程奏明辦理一請嚴定期限以復淮鹽之舊制也查同治十年曾國藩奏川鹽侵占太甚一摺內稱湖廣督臣李瀚章外間頗議其袒護川鹽膜視淮鹺今欲楚岸鹺綱之平允但在楚督一心之轉移一心向川則川銷旺分心向淮則淮銷旺等語臣等竊謂各省之令行禁止未有不視督撫之心爲轉移者也向使川楚各督臣能照曾國藩暨臣部條議早封私井禁川鹽何致川淮互爭喧賓奪主如今日之甚耶今欲規復淮綱惟有責成四川督臣李瀚章

署湖廣督臣翁同爵督飭所屬查照臣部此次議定章程迅速籌辦如查封私井立限若干日封禁完竣疏銷邊引立限若干日招商起運復設巡卡立限若干日布置周匝先將何日起辦立限何日竣事聲明報部一俟竣事之日再行專案奏報統以一年爲限務將應辦各事宜於文到一年期內一律辦理完妥限期所在卽考成所在如有遲逾應由臣部查明係屬何事遲延卽將該管之員指名參處似此嚴定期限庶足以儆玩滯肅鹺綱而川私可絕淮岸可復矣一請講求煎煉以利淮鹽之銷路也查同治七年曾國藩奏稱川鹽自行楚後

廣開井竈色白質潔淮南垣商近因力乏鹽色不無稍減李鴻章亦言淮鹽色味均劣川鹽色味均優民情好惡有恆未便以飲食細故強所不欲夫淮鹽本不敵川益以道遠利微更難免泥沙麁雜儻盡禁之後而淮商仍以此等劣鹽行楚非特於民食大有不便且適啟川販以暗圖侵灌之機應請

敕下江督轉飭兩淮運使嚴督垣商精求煎煉之法務要鹽色一律乾潔純白足以敵川至運鹽到岸應責令督銷委員逐包查驗如有麁和泥沙圖壓斤兩等弊立予重究不貸庶使民間不致貴川賤淮而淮引得以暢銷矣

以上章程五條如兩江川楚各督臣果能同顧大局實力奉行似於禁川復淮尙無難辦之處至淮課川釐互爲消長彼絀則此必贏見時旣議禁川應令楚督卽將湘鄂兩省向設抽收川稅各局卡統行裁撤並將撤局日期截清報部其撤局後楚省減去川釐入款前經曾國藩議將淮釐多撥數成歸鄂或全數歸鄂餉項攸關應卽飭令江楚兩督臣通盤籌畫會議定章專案覆奏以憑核辦再查該御史原奏內稱湖南之平江向食碱鹽自爲一宗每年銷至萬引在湘岸內獨早運三綱等語查兩淮鹽法志開平江縣額行淮引九百六十道係

於何年改食碱鹽其碱鹽是否該縣土產抑由何處運
銷一縣民戶幾何每年銷至萬引之多較原額幾加十
倍且於湘岸內獨早運三綱見在究已運至某綱何以
未據兩淮分別提報應令兩江總督湖南巡撫卽飭詳
晰查明逐節聲復報部核辦至該御史原奏所稱同治
十三年二月川梟聚眾焚掠岳州府屬之緝私卡局各
節應由臣部知照刑部自行查辦合併聲明

謹按部議令湘鄂兩省盡撤抽收川稅局卡其後卒
不能從詳見下卷

兩淮鹽法志卷五十五